
ԱՐՄԱՆ ԿԻՐԱԿՈՍՅԱՆ, Ակնարկներ Հայկական հարցի և Եդեռնի միջազգային ճանաչման պատմության, Ե., «Տիգրան Մեծ» հրատ., 2006, 252 էջ:

ԱՐՄԱՆ ԿԻՐԱԿՈՍՅԱՆ, Հայկական հարցը և հայերի ցեղասպանությունը, Ե., «Նորավանք» գիտակրթական հիմնադրամի հրատ., 2006, 101 էջ:

Արման Կիրակոսյանի «Ակնարկներ Հայկական հարցի և Եդեռնի միջազգային ճանաչման պատմության» ժողովածուն ներառել է հեղինակի կողմից 1980-ական և 1990-ական թթ. սկզբին հայերենով և ռուսերենով հրապարակված շուրջ 30 գիտական, գիտահրապարակախոսական, հանրագիտարանային հոդվածներն ու գրախոսականները, որոնք նվիրված են Հայկական հարցի պատմության, տերությունների քաղաքականության, հայ ժողովրդի ազգային-ազատագրական շարժման, 1894-1896 թթ. և Առաջին աշխարհամարտում ու դրանից հետո հայերի ցեղասպանության հարցերին վերաբերող արևմտյան պատմագրության, Եդեռնի միջազգային ճանաչման գործընթացի լուսաբանմանն ու պատմության կեղծարարության քննադատությանը:

Արման Կիրակոսյանի հոդվածներում արծարծված խնդիրների լայն ընդգրկումը, որոնք առ այսօր չեն կորցրել քաղաքական և գիտական այժմեականությունը, պայմանավորվում է դեռևս 1960-1970-ական թթ. Խորհրդային Հայաստանում հիմնված և ձևավորված քաղաքական հայագիտության դպրոցի առկայությամբ, որի ներկայացուցիչն է նաև գրքի հեղինակը: Այս ժողովածուն վկայում է այն մասին, որ Ա. Կիրակոսյանը շարունակում է իր հոր՝ Ջոն Կիրակոսյանի և նրա սերնդակից պատմաբանների գիտահրապարակախոսական գործունեությունը Հայկական հարցի պատմության և հայերի ցեղասպանության պատմության ուղղությամբ:

Գիրքը բաղկացած է 4 գլուխներից, առաջաբանից և վերջաբանից, վերջում գետեղված է Ա. Կիրակոսյանի աշխատությունների ամբողջական ցանկը: Հեղինակը որպես նախաբան օգտագործել է «Հայկական Հարց» հանրագիտարանում (ռուսերեն՝ Ժ., 1992, հայերեն՝ Ե., 1996) տպագրված «Հայկական հարց» հոդվածը, որը հակիրճ կերպով ընթերցողին է ներկայացնում XIX դ. վերջի – XX դ. հայ ժողովրդի քաղաքական պատմության զարգացումները:

Առաջին «Հայկական հարցը 19-րդ դարի երկրորդ կեսին» գլխում Ա. Կիրակոսյանը ընդգրկել է 6 աշխատանք, որոնցից երկուսը՝ «1877-1878 թթ. ռուս-թուրքական պատերազմը և Հայկական հարցը» և «Ազգային-ազատագրական շարժումներ» հոդվածները, հանրագիտարանային են, վերցված են «Հայկական Սովետական Հանրագիտարանի» «Սովետական Հայաստան» լրացուցիչ հատորից: Հիմնականում նախկինում չօգտագործված ամերիկյան մամուլի նյութերի հիման վրա գրված «Հայկական հարցը ԱՄՆ-ի ամսագրերի էջերում (19-րդ դարի 90-ական թթ. կեսեր)» և «Աբդուլ Համիդի հակահայկական քաղաքականությունն ու 1894-1896 թթ. հայկական կոտորածները» հոդվածները լուսաբանում են 1890-ական թթ. արևմտահայության ծանր վիճակը, հայկական կոտորածները, Աբդուլ Համիդի հակահայկական քաղաքականությունը: Թուրքագետ Ռ. Սաֆրաստյանի՝ 1985 թ. լույս ընծայած «Օսմանիզմի դոկտրինան Օսմանյան կայսրության քաղաքական կյանքում (19-րդ դարի 50-70-ական թթ.)» գրքի տեսական վերլուծությանն է նվիրված Ա. Կիրակոսյանի «Ուշագրավ ուսումնասիրություն» գրախոսականը: Մեծ հետաքրքրություն է ներկայացնում գրքում գետեղված բրիտանական «Քոնթենտորարի Ռեվյու» ամսագրում 1896 թ. տպագրված՝ Ավ. Նազարբեկյանի

«Զեյթուն» հոդվածի հայերեն թարգմանությունը, որը Ա. Կիրակոսյանի առաջաբանով առաջին անգամ հրապարակվել է 1990 թ. «Երեկոյան Երևան» թերթում:

«Առաջին համաշխարհային պատերազմը և արևմտահայությունը» գլխում, բացի «Առաջին համաշխարհային պատերազմը և Հայաստանը» հանրագիտարանային հոդվածից, ներառված են պատմաբանի՝ հայերի ցեղասպանության արևմտյան պատմագրության տեսությանը վերաբերող աշխատանքներ: Առաջին համաշխարհային պատերազմի շրջանի գերմանական աղբյուրների, Մեծ Բրիտանիայի և ԱՄՆ-ի՝ Հայկական հարցի պատմագրության լուսաբանման են նվիրված Ա. Կիրակոսյանի մյուս երկու աշխատանքները, որոնցից առաջինը Ստ. Ստեփանյանի 1991 թ. հրատարակած փաստաթղթերի և նյութերի ժողովածուի գրախոսականն է: Խիստ հետաքրքիր է գիտաքաղաքական այժմեականությունն այսօր էլ չկորցրած, խորհրդային «Вопросы истории» գիտական ամսագրում Ջ. Կիրակոսյանի և Ա. Միհրանյանի համահեղինակությամբ 1986 թ. հրապարակված «Օսմանյան կայսրության հայերի 1915-1916 թթ. ողբերգությունը արևմտյան պատմագրության լույսի ներքո» հոդվածը:

Երրորդ գլուխը նվիրված է տերությունների քաղաքականությանը Հայկական հարցում: Ընթերցողը հնարավորություն է ստացել հարուստ տեղեկություններ քաղելու «Մեծ Բրիտանիան և Հայկական հարցը», «Ավստրո-Հունգարիան և Հայկական հարցը» (համահեղինակ՝ Ա. Օհանջանյան), «Իտալիան և Հայկական հարցը» (համահեղինակ՝ Ս. Մանուկյան), «Հայկական Հարց» հանրագիտարանի հոդվածներից, «1895-1897 թթ. Մերձավորարևելյան ճգնաժամը, Հայաստանը և ԱՄՆ-ի քաղաքականությունը», «Ավստրո-Հունգարիայի քաղաքականությունը Հայկական հարցում (1895-1897)» գիտական աշխատանքներից, Ա. Նասիբյանի՝ 1984 թ. հրատարակած «Բրիտանիան և Հայկական հարցը 1915-1923 թթ.» գրքի գրախոսականից, ինչպես նաև Հայկական հարցում Ռուսաստանի քաղաքականությանը նվիրված՝ հայտնի պատմաբան, արվեստագետ և թատերագետ, Հայաստանի Գիտությունների ակադեմիայի թղթակից անդամ Ա. Զիվելեգովի 1917 թ. արտասանած ելույթից (որն, ի դեպ, առաջին անգամ հրապարակվել է Ա. Կիրակոսյանը, 1992 թ. «Эпоха» թերթում):

Ժողովածուի չորրորդ գլխում Արման Կիրակոսյանը ընդգրկել է Եղեռնի միջազգային ճանաչման և պատմության կեղծարարության խնդիրների լուսաբանմանը վերաբերող հետևյալ հոդվածները. «Ժողովուրդների մշտական ատյանը հայերի ցեղասպանության մասին», «Եվրոպական խորհրդարանի բանաձևը «Հայկական հարցի քաղաքական լուծման մասին» (համահեղինակ՝ Ռ. Մաֆրաստյան), «Հայկական ցեղասպանության հարցը «թուրքական ուղերձի» ծուռ հայելու մեջ» (համահեղինակ՝ Ռ. Մաֆրաստյան), «Հայերի ցեղասպանությունը և օսմանյան արխիվները» (համահեղինակ՝ Ռ. Մաֆրաստյան), «Ոճրագործությունը մոռացված չէ» (համահեղինակ՝ Ռ. Մաֆրաստյան), «Փաստաբան Դե Մալվիլի պատկերը» (համահեղինակ՝ Ռ. Մահակյան), «Լեռնային Ղարաբաղի հարցում Թուրքիայի զանգվածային լրատվամիջոցների դիրքորոշման մասին» (համահեղինակներ՝ Լ. Էյրամջանց, Ռ. Մաֆրաստյան), «Ջոն Կիրակոսյանի «Երիտթուրքերը պատմության դատաստանի առաջ» գրքի վերջաբանը»:

Պատմաբանը, որպես ժողովածուի վերջաբան, օգտագործել է 1955 թ. Սդերդի (Թուրքիա) քրդաբնակ Շիրնակ գյուղում ծնված, հայազգի Ն. Չաքմաքչյանի՝ 1982 թ. Հայաստանի արտաքին գործերի նախարար Ջ. Կիրակոսյանին ուղղած նամակը, որն առաջին անգամ Ա. Կիրակոսյանի և Գ. Ասատրյանի առաջաբանով հրապարակվել է 1989 թ., «Գրական թերթում»:

Ժողովածուն ընթերցվում է հետաքրքրությամբ, պարունակում է զգալի փաստագրական և տեսական նյութ, կարող է օգտակար լինել հայ ժողովրդի քաղաքական պատմության, խորհրդային շրջանի և պատմագրության մասնագետների, թուրքագետների, միջազգայնագետների, դիվանագետների, ուսանողների ինչպես նաև հանրապետության և սփյուռքի ընթերցող լայն շրջանների համար: Նշենք, սակայն, որ հեղինակը գրքում չի ընգրկել իր հեղինակած մի շարք հոդվածներ, մասնավորապես, «Հայկական հարցում ռուս-անգլիական հարաբերությունների պատմությունից», «Անգլո-թուրքական հարաբերությունները և բարենորոգումների խնդիրը Արևմտյան Հայաստանում (1895 թ.)», «1896 թ. Կոստանդնուպոլսի ջարդի շուրջ», «1896 թ. անգլո-ռուսական բանակցությունները և Հայկական հարցը», «Բրիտանական դիվանագիտությունը և հայկական բարենորոգումների խնդիրը 1912-1914 թթ.» և մի քանի այլ աշխատանքներ (տե՛ս Ա. Կիրակոսյանի աշխատությունների ցանկը, էջ 252-259): Թեև հեղինակը առաջաբանում նշում է, որ «գրքի մաս չեն կազմել գիտական այն հոդվածները, որոնք հետագայում ընդգրկվել են հեղինակի հրապարակած մենագրություններում» (էջ 3), այդուհանդերձ, այդ հոդվածները կարող էին ընթերցողին էլ ավելի ամբողջական պատկերացում տալ Ա. Կիրակոսյանի գիտական գործունեության մասին:

Պատմաբան և դիվանագետ Ա. Կիրակոսյանը «Հայկական հարցը և հայերի ցեղասպանությունը» պատմաիրավական եռալեզու (հայերեն, ռուսերեն, անգլերեն) աշխատության մեջ պատմագիտական տեսանկյունից ցույց է տալիս Հայկական հարցի սկզբնավորումը: Նա գրում է. «Հայկական հարցը, որի առաջացումն ի սկզբանե պայմանավորված էր հայկական պետականության անկումով, իսկ հետագայում՝ XIX դ. 70-ական թթ. սկսած, Օսմանյան կայսրության տարածքում բնակվող հայերի վիճակի կտրուկ վատթարացումով և ազգային ինքնագիտակցության զարթոնքով, դարձավ արևելյան հարցի բաղկացուցիչ մասը, կարևոր տեղ գրավեց միջազգային հարաբերություններում, մեծ տերությունների մերձավորարևելյան քաղաքականության մեջ, Օսմանյան կայսրությունում ազդեցության ոլորտների և նրա տիրույթների բաժանման համար նրանց պայքարում» (էջ 3):

Հեղինակը մատնանշում է, որ պատմական Հայաստանի արևմտյան ու արևելյան հայաբնակ հատվածները պայմանականորեն անվանվում են Արևմտյան Հայաստան և Արևելյան Հայաստան: Արևմտյան Հայաստան անվանումը գիտական ու քաղաքական շրջանառության մեջ է մտել դեռևս 387 թվականից ի վեր, երբ Մեծ Հայքի թագավորությունը բաժանվել էր Սասանյան Պարսկաստանի և Հռոմեական կայսրության միջև: Արևմտյան Հայաստանը Թուրքիայի տիրապետության տակ է ընկել 1555 թ. Պարսկաստանի հետ կնքված Ամասիայի պայմանագրով, իսկ Արևելյան Հայաստանը Ռուսաստանին է անցել 1828 թ. Պարսկաստանի հետ կնքված Թուրքմենչայի պայմանագրով: Աշխատությունում Ա. Կիրակոսյանը իրեն հատուկ գիտականությամբ է բնութագրում Հայկական հարցը. «Հայկական հարցը հայ ժողովրդի քաղաքական պատմության, այն է՝ օտարների տիրապետությունից Հայաստանի ազատագրման, Հայկական լեռնաշխարհում ինքնուրույն հայկական պետականության վերականգնման, հայ ժողովրդի համախմբման և այդ նպատակին հասնելու համար մղված հայ ազգային-ազատագրական պայքարի հիմնահարցերի ամբողջությունն է» (էջ 5): Հայկական հարցին, Հայոց ցեղասպանությանն ու միջազգային ճանաչման ներկայիս գործընթացին վերաբերող խնդիրները հեղինակը դիտարկում է դիվանագիտական պատմության և իրավապայմանագրային տեսանկյունից: Սա կարևոր հրատարակություն է, քանի որ, հիմնվելով գիտական ուսում-

նասիրությունների, պատմական փաստերի և դիվանագիտական փաստաթղթերի վրա, հեղինակը կարողացել է շուրջ 40 էջի սահմաններում ստեղծել յուրատեսակ ամփոփ մի ուղեցույց ինչպես մեր պաշտոնյաների, դիվանագետների, ուսանողների, այնպես էլ օտարերկրյա մասնագետների, դիվանագետների և քաղաքագետների համար: Կառա-
ջարկեինք, որ «Նորավանք» հիմնադրամը կազմակերպեր տեղեկանքի՝ նաև այլ լեզու-
ներով թարգմանությունն ու հրատարակումը:

Գիտնականի, պատմաբանի ու դիվանագետի հրապարակած աշխատությունները մեծ հետաքրքրությամբ կարող են ընթերցել հասարակության ամենալայն շրջանները:

ՄՏԵՓԱՆՅԱՆ Ս. Ս.

Պատմական գիտությունների դոկտոր